

Inatsisissatut siunnersuummut oqaaseqaatit

Oqaaseqaatit nalinginnaasut**1. Aallaqqaasiut**

Namminersornerullutik Oqartussat missingersuutaat pillugit Inatsisartut inatsisaanni (Missingersuutitut inatsimmi) nr. 8, 29. oktober 1999-imeersumi, Inatsisartut inatsisaatigut nr. 1, 23. maj 2000-imeersukkut allanngortinneqartumi § 10-mi aalajangersakkami allassimavoq aningaasanut inatsit ukioq aningaasanut inatsiseqarfiusoq sioqqullugu 15. november nallertinnagu akuersissutigineqartassasoq. Aalajangersagaq taamaaqataa Inatsisartut Naalakkersuisullu pillugit Inatsisartut inatsisaanni § 15, imm. 1-imi allassimavoq.

Naalakkersuisut ulloq 27. oktober 2016-imi allanngornerat tunuliaqutaralugu, Naalakkersuisunik allannguinerup pisariaqalersitaanik aningaasanut inatsisissatut siunnersuutip allannguutai sapinngisamik amerlanerpaat ilanngunniarlugit, 2017-imut aningaasanut inatsisissap akuersissutigineqarnissaanut piffissaliussaq sivitsorneqassasoq matumuuna siunnersuutigineqarpoq. Taamattaarlugu Inatsisartut aningaasanut inatsisissatut siunnersuummik suliaqarnissaminut piffissaqarluarnissaata qulakkeernissaa kissaatigineqarpoq.

Tamannali aamma piffissaliussat allat sivitsorneqartariaqarnerannik kinguneqassaaq:

Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi aalajangersarneqarpoq, nunamut tamarmut akileraarutissap aamma nunamut tamarmut immikkut akileraarutissap procentii qaammatsiutit malillugit ukioq pineqartoq sioqqullugu 15. november nallertinnagu Inatsisartunit aalajangerneqartassasut. Procentit akileraarusiissutit aningaasanut inatsisip ilaatut angissusilerneqartarput. Taamaammatt siunnersuutavoq ukioq manna piffissaliussaq, aningaasanut inatsisissap akuersissutigineqarnissaanut piffissaliussaq assigalugu 25. novemberimut sivitsorneqassasoq.

Aningaasarsianit akileraarutit pillugit Inatsisartut inatsisaanni (§ 62, imm. 2-mi) aalajangersarneqarpoq kommunimut akileraarutissap procentia qaammatsiutit malillugit ukioq pineqartoq sioqqullugu 1. december nallertinnagu kommunalbestyrelsimit aalajangerneqartassasoq. Kommunit missingersuusiortarnerat, aningaasanik tigorianaateqarnerat, naatsorsuutaat, kukkunersuisoqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaanni nr. 3, 3. februar 2012-imeersumi aalajangersarneqarpoq, kommunimut ukiumut aningaasanut inatsiseqarfiusumut tullermut missingersuutaat kingusinnerpaamik kommunimut akileraarutip procentiata, Aningaasarsianit akileraarutit pillugit Inatsisartut inatsisaat malillugu angissusilerneqarnissaanut piffissaliussaq nallertinnagu akuersissutigineqarsimassasut.

Aningaasanut inatsisissap suliarineqarnissaanik kinguartitsinerup aammattaq kingunerissavaa kommunit kommunalbestyrelsillu 2017-imut missingersuutinik kommunimullu akileraarummik akuersissuteqarnissaminut piffissakinnerunissaat, tamannalu kommunit aalajangersakkanik taakkuninnga malinninniarnissaannut ajornakusoortitsisinnaavoq. Taamaammat siunnersuutaavoq 2017-imut kommunimut akileraarummik angissusiliinissamat piffissaliussaq 7. decemberimut sivitsorneqassasoq.

Meeqqanut suli atualingitsunut perorsaanikkut inerikkiartuutaasunik ulluunerani neqeroorutitut akiliuteqartarneq pillugu Namminersorlutik Oqartussat nalunaarutaanni nr. 3, 4. februar 2011-meersumi (§ 1, imm. 1-imi) aalajangersarneqarpoq, kommunalbestyrelsi meeqqanut suli atualingitsunut ulluunerani neqeroorutitut ukiumi tullermi akigititassanik kingusinnerpaa-mik novemberimi aalajangersaasassasoq. Aningaasanut inatsisip akuersissutigineqarnissaanut piffissaliussamik kinguartitsineq kommunit aalajangersakkanik taakkuninnga malinninniar-nissaannut ajornakusoortitsisinnaavoq. Taamaammat siunnersuutaavoq 2017-imi akigititassa-nik angissusiliinissamat piffissaliussaq 7. decemberimut 2016-imut sivitsorneqassasoq.

2. Siunnersuutip imarisai pingaernerit

2017-imut aningaasanut inatsisip akuersissutigineqarnissaanut piffissaliussaq siunnersuutip kingunerisaanik 25. november 2016-imut sivitsorneqassaaq. Piffissaliussat allat, Inatsisartunut kommunalbestyrelsinullu atuuttut taassuma kingunerisaanik aamma sivitsorneqassapput, tak. aallaqqaasiineq aalajangersakkanullu ataasiakkaanut oqaaseqaatit.

3. Pisortanut aningaasatigut allaffissornikkullu sunniutissai

Siunnersuutip pisortanut sunniuteqangaarnissaa naatsorsuutigineqanngilaq. Kisianni missi-ngersuutinik, akileraarusiissutissat angissusiinik aammalu meeqqanik paaqqinninnermut aki-gititassanik nutaanik akuersissuteqarnissat pisarnermit kingusinnerusukkut pissapput.

4. Inuussutissarsiutinik ingerlataqartunut il.il. aningaasatigut allaffissornikkullu sunniutissai

Siunnersuut inuussutissarsiutinik ingerlataqartunut aningaasatigut sunniuteqassanngilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu sunniuteqassanngilaq.

6. Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqassanngilaq.

7. Naalagaaffeqatigiinnermut Namminersorlutillu Oqartussanut tunngasut

Siunnersuut Naalagaaffeqatigiinnermut Kalaallilluunniit Nunaata tunngaviusumik inatsisitigut inissisimaneranut sunniuteqassanngilaq.

8. Oqartussaasunik kattuffinnillu tusarniaaneq

Siunnersuut piffissakilliorneq pissutigalugu tusarniaassutigineqanngilaq. Inatsisissatut siunnersuut Namminersorlutik Oqartussani naalakkersuisoqarfiit attuumassuteqartut isumasiorlugit suliarineqarpoq, soorluttaaq kommunit tamatuminnga ilisimatinneqareersut.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

1. Inatsisartut 2017-imut aningaasanut inatsisaata kingusinnerpaamik 25. november 2016-imi akuersissutigineqarnissaa siunnersuutigineqarpoq. Taamaaliornikkut Missingersuutinut inatsimmi § 10 aamma Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliussat atuuttut (15. november) avaqunneqassapput.

Nunamut tamarmut akileraarutip aamma nunamut tamarmut immikkut akileraarutip 2017-imut procentissaasa kingusinnerpaamik 25. november 2016-imi angissusilerneqarnissaat siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi piffissaliussat atuuttut (15. november) avaqunneqassapput.

Kommunimut akileraarutip 2017-imi procentiata kingusinnerpaamik 7. december 2016-imi angissusilerneqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 62, imm. 2-mi piffissaliussaq atuuttoq (1. december) avaqunneqassaaq. Kommunimut akileraarummik akuersissuteqarnissamut piffissaliussamik allannguinerup aammattaaq kingunerissavaa kommunit 2017-imut missingersuutaasa, Kommunit missingersuusiortarnerat, aningaasanik tigorianaateqarnerat, naatsorsuutaat, kukkurnersuisoqarnerat kiisalu karseqarnerat naatsorsuseriveqarnerallu pillugit Namminersorlutik Oqartussat nalunaarutaat nr. 3, 3. februar 2012-imeersoq naapertorlugu akuersissutigineqarnissaannut piffissaliussap taamatulli tassaalernissaa 7. december 2016.

Kiisalu siunnersuutaavoq, meeqqat suli atualinngitsut kommunit ulluunerani neqeroorutaanniinnerinut 2017-imi akiliutissat kingusinnerpaamik 7. december 2016-imi angissusilerneqassasut. Taamaaliornikkut Meeqqanut suli atualinngitsunut perorsaanikkut inerikkiartuutaasu-

mik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaanni nr. 3, 4. februar 2011-imeersumi § 1, imm. 1-imi piffissaliussaq atuuttoq (kingusinnerpaamik novemberimi) avaqqunneqassaaq.

§ 2-mut

Inatsisip akuersissutigineqarnermini erngerluni atortuulernissaa, ullorlu 1. januar 2017-imi ingerlaannaq atorunnaarnissaa siunnersuutigineqarput.